

de Istevene Demelas

Abbattigados che los hana a fundu,

totu cuddos umiles mestieris,

chi pane nos hat dadu fin'a deris;

'oe tot'un'imboligu est su mundu.

Pius no s'iden sas manos callosas

de su messaju e-i su frailarzu...

chie zappende e pistende s'attarzu,

cun bideas pulidas, decorosas.

Pius no s'idet su fraigamuru,

fatendesi sa domo a pedra e ludu.

E da-i sos amigos cudd'aggiudu

pediat, ma lu torraiat puru.

Pius no s'idet cuddu calzeraju,

chi faghiat sas bottes de facchetta.

Ne-i su pastoreddu in sa pinneta,

bezzu de chiza, chi pariat gaju.

Pius no s'idet cudda tessidora,

cun su telarzu fatende tappetos,

arazzos bellos, disegnos perfetos,

fressadas caldas. E-i sa coghidora,

suighende su pane cummassadu

subra sa mesa, poi in canistreddu,

saboridu, chivalzu e poddineddu

e cottu in su furru indeoradu.

Pius no s'idet su carrasegare,

fattu in sas pinnetas divertende.

Chi s'andaiat a brincos ballende,

bezzos, pizzinnos, fin totu cheppare.

